



**Winterheil (Sommerheil)|| Der Kleinen Catho-||lischen  
Postill/ Jacobi || Feuchthij/ Weyhbischoffs|| zu Bamberg/  
der H.|| Schrift D.||**

Darin[n]en kürztlich vn[d] Catholisch/|| alle Sontägliche Fest vn[d]  
Feyrtägliche|| Euangelien ...

**Feucht, Jakob**

**Cöln, M.D.XCV.**

**VD16 F 850**

Am Feyertag des H. Ertzengels Michaels.

---

[urn:nbn:de:hbz:466:1-61414](https://nbn-resolving.org/urn:nbn:de:hbz:466:1-61414)



388 Am Feiertag des H. Erhengels  
Michaelis / Euangelium  
Matth. xviii.

Am 29. tag  
Septemb.



Mar. 9. d  
Luc. 9. c

**I**n der zeit trattē die Jün-  
ger zu IESV/ vñ sprachē:  
Wer ist doch der grössst  
im Himmelreich? Vnd  
IESVS rieff einem kind  
zu ihm/ vñ stellet das mit-  
ten vnder sie/ vñ sprach: Wahrlich sag ich  
euch/ es sey dan daß ihr euch umbkeret/ vnd  
werdet wie die kinder/ so werdet ihr nit ins  
Himmelreich kommen. Wer sich nun selbs  
nidriget/ wie diß kind/ der ist der grössst im  
Himmelreich. Vnd wer ein solch kind auff-  
nimpt in meinem namen/ der nimpt mich  
auff. Wer aber einen ergert auß disen klei-  
nen/

1. Pet. 2. a  
Mar. 9. f  
Luc. 17. a



nen/die an mich glauben/ dem were besser/  
daß ihm ein mühlstein an seinen halß gehan-  
gen würde/ vnd daß er ertrencket würde im  
Meer/da es am tieffsten ist. Wee der Welt Luc. 17. b  
der ergernuß halben. Dann es muß ja er- 1. Cor. 11. b  
gernuß kommen / doch wee dem Men-  
schen/durch welchen ergernuß kompt. So  
aber dein hand oder dein fuß dich ergert/so Matth. 5. d  
hawe ihn ab/ vnd wirff ihn von dir. Es ist Mar. 9. c  
dir besser/ daß du zum leben lam oder krü-  
pel eynghehest/ dann daß du zwo hend oder  
zween füß habest/ vnd werdest in das ewig  
feyr geworffen. Vnd so dich dein aug er-  
gert/ reiß es auß/ vnd wirffs von dir. Es ist  
dir besser/ daß du einäugig zum leben eyn-  
gehest/ dann daß du zwey augē habest/ vnd  
werdest in das Helligsch feyr geworffen.  
Sehet zu/ daß ihr nit verachtet jemād von  
disen kleinen. Dann ich sag euch/ ihre En- Luc. 19. b  
gel sehē allzeit das angesicht meines Vat-  
ters/ der in den Himmeln ist.

Wer sich nun selbst nidriget wie diß kind/  
der ist der grössert im Himmereich.

Matth. xviii.

**J**eweil wir Catholische Chris-  
ten (ihr geliebten in GOTT)  
durch das ganze Jar / vnd eben  
auff disen heutigen tag / ein vnd  
nur ein Fest vnd Feyertag halten

b 4 von



vonden heiligen Engeln GOTTES/möchte auff  
 heut in vorhabender Predig nit vnfüglich von  
 denselbigen/von ihrer Erschaffung/Ampt/thun  
 vnd lassen/ Ob sie auch vns dienen/für vns dro-  
 ben im Himmel GOTT den Allmechtigen bit-  
 ten/ Ob wir auch sie zu GOTT als vnserer Für-  
 sprech bitten vnd anruffen mögen/ vnd vnder-  
 gleichen Puncten vnd Stücken handeln: weil  
 wir aber bishero (in diser kleinen Postill) solche  
 vnd dergleichen Materien/ immer bis zu seiner  
 zeit auffgeschoben/ vnd etwas näheters bey dem  
 Text jeder Euangelien gebliben/wollen wir auch  
 auff heut vnser weiß vnd fürnehmen nit vber-  
 schreiten/sonder jekund auch/wie bishero besche-  
 hen/verhalten.

Inhalt diß  
 heutigen  
 Euangellij.

Diß jekund verlesens Euangelium auff diß  
 heilig Fest des Erzengels Michaelis vnd aller  
 Engel GOTTES/haltet in sich ein Gespräch  
 zwischen den Jüngern vnd Christo ihrem Her-  
 ren. Die Frag der Jünger ist: Welcher der größte  
 seyn werde in seinem Reich? Die antwort des  
 Herren ist: Die jenigen/ so sich am allermeisten  
 demütigen vñ niemands kein Ergernuß geben.

Inhalt vnd  
 Theilung  
 diser Pre-  
 digt.

Von disen beiden wölle wir heut etwas weit-  
 leuffigers handeln nach den zweyen Theilen vor-  
 habender Predig. Im ersten: Von der Demü-  
 tigkeit/ die wir haben müssen/ wann wir wollen  
 Selig werden. Im andern: Von der Ergern-  
 nuß/welche wir meiden müssen/ auff daß wir nit  
 zeitlich vnd Ewig gestrafft werden. Welches al-  
 les ihr mit gedult anhören wölt/ so wil auch ich  
 euch solchs gutwillig auff das leichtest vnd für-  
 best



fürkest fürhalten. GOTT wölle mir vnd euch  
hierzü seinen Göttlichen Segen verleihen zc.

**D**as die Jünger des Herren/ ehe  
das sie den heiligen Geist empfangen/  
noch vnuerstendig/ gleich andern Men-  
schen mißgünstig vnd Ehrgeizig gewesen seyen/  
haben wir diß Jar abe der Cankel mehrmaln  
gehört/ vnd fürnemlich am Fest oder Feyertag  
des heiligen Apostels Jacobi/ aldo gehört: Das  
die zehen Jünger gezürnt haben vber die zween  
Brüder/ Jacobum vnd Joannem den Euan-  
gelisten/ darumb/ das sie ihr Mutter vnderrich-  
tet/ für sie bey Christo anhalten/ das der eine  
zu seiner rechten/ der ander zur lincken in seinem  
Reich sitzen möchte. Darnach an Sanct Bar-  
tholomei tag: Das sich die Jünger am letzten  
Abendmal vndereinander gezanckt haben/ wel-  
cher vnder ihnen der größte seyn solt. Also auch  
auff heut/ als Christus den Zol für sich vnd für  
Perrum den obersten vnder den Aposteln bezalt  
hette/ besorgte abermal die anderen Jünger/ Pe-  
trus wurde der fürnemste Apostel vnd der größ-  
est vnder ihnen im Reich Christi seyn. Auff das  
sie derhalben doch (als sie vermeynten) ein mal  
gewiß erfahren möchte/ wer der fürnemste vnder  
ihnen sene/ Tratten sie zu IESV/ vnd spras-  
chen: Wer ist doch der größte im Himmel-  
reich? Vnd IESVS rieß ein kind zu sich/  
vnd stellet das mitten vnder sie/ vñ sprach:  
Warlich sage ich euch/ Es seye dann das  
ihr euch umbferet/ vnd werdet wie die

Matth. 20.

Ehrgeizig-  
keit vñ miß-  
gunst der  
Jünger  
Christi.  
Luc. 22.



Welche ins  
Himmelreich  
kommen.

Junge Kin-  
der seynd nit  
Ehrgeizig.

Kinder/so werdet ihr nit ins Himmelreich kommen. Daß diese Frag der Jünger vil mehr auß Ehrgeizigkeit vnd fürwitz/ dann auß rechtmessigen vrsachen herkommen vnd entsprungen seye/ ist nit zu zweiffen. Dann (wie gemeldet) ein jeder vnder den Jüngern des Herren were gern/ erstlich hie auff Erden/ dann auch droben im Himmel/ der oberste vnd fürnemste vnder ihnen gewesen. Auff daß aber der Herr ihnen solche Ehrgeizigkeit außredē möchte/ lehret er sie/ daß man nit durch Ehrgeizigkeit/ sonder durch Demütigkeit hiez zu kommen müsse: Vnd/ daß die stolzen/ vbermütigen/ hoffertigen/ Ehrgeizigen/ mißgünstigen leut/ nit allein den obersten ort im Himmel/ sonder das Himmelreich gar nit besitzen werden: Demütigkeit vñ nit hoffertigkeit/ vil weniger Ehrgeiz/ seye hiez zu von nöten: Derhalben müssen sie ein Exempel von den jungen kindern nehmen/ vñ von ihnen lernen Demütig seyn. Dann die jungen kinder achten sich nit vil weder hoffart noch Ehrgeizigkeit/ was man mit ihnen handelt vnd machet/ man setze sie hinden oder fornen an Tisch/ so seynd sie wol zu friden/ mißgönnen keinem was ihme GOTT vergönt/ verdreust sie auch nit wann jemandes vor ihnen gehet oder stehet/ so zu grösseren Ehren gebraucht wirdt als sie: Also müst ihr auch meine Apostel/ do ihr begert das Himmelreich zu besitzen/ Demütig werden/ vnd forthin nit/ wie bishero geschehen/ nach Hoffart vnd Ehrgeiz/ nach grossen Ehren vnd hohen Sitten streben.

Diß



Diß ist (jhr geliebtē in GOTT) nit allein den Lehr an alle  
Aposteln/sonder auch vns Christen allen gesagt. Christen.

Ja allen den jenigen/ so nach disem zergenglich-  
chen leben das Ewig zu besitzen begeren/ ist ge-  
sagt: Daß sie sich als die kinder demütigen sollen  
vor GOTT vnd der Welt/ mit Worten vnd  
Wercken/ thun vnd lassen/ stehn vnd gehn/ han-  
del vnd wandel/ in Kleidung/ Sitten vnd geber-  
den: sich nit lassen mehr geduncken dann wir  
seynd/ nit mehr versprechen noch vnderfangen  
dañ wir verrichten könden: vnd do vns GOTT  
etwas für einem andern geben/ es seye zu Leib  
oder zur Seel/ am verstand/ geschicklichkeit/ oder  
am zeitlichen Gut/ sollen wir dasselbig mit höch-  
ster dancksagung annehmen/ vnserm Nechsten/  
der solche Gnaden vnd Gaben von GOTT nit  
hat/ desto mehr dienen/ vnd nit verachten oder  
vndertrucken/ dann GOTT solche Sünd nit  
ohne gestrafft lassen wil. Vnd gewislich seynd  
der vrsachen/ darumb wir Christen Demütig  
seyh sollen/ so vil vns möglich ist/ vor GOTT  
vnd der Welt/ nit wenig noch geringe/ sonder  
gar vil vnd wichtige/ deren etliche wir jekund  
lehren vnd hören wollen/ auff daß wir desto ehe  
zu rechter Demut/ vnd volgentis zu desto hö-  
herm Sitz in der Ewigen Seligkeit kommen  
mögen.

Vrsachen  
wahrer De-  
mütigkeit.

Wan wir erstlich vnd vleissig bedencken vnd  
ernstlich nachgedencken wurden/ Daß wir al-  
les/das wir seynd vnd haben/ nichts seynd noch  
haben von vns selbst/ weder Leib noch Seel/  
weder Haab noch Gut/ weder Reichthumb  
noch

Die erste  
vrsach/dar-  
umb wir bil-  
lich demütig  
seyh sollen.



noch Gesundheit/ weder Kunst noch Geschick-  
 ligkeit/ weder Kind noch Gesund/ weder Essen  
 noch Trinken/ vnd in summa nichts auff diser  
 Welt/ es sey auch so wichtig oder gering als es  
 immer wolle oder seyn kan/ haben wir von vnd  
 auß vns selbst: Sonder/ alles/ so wir seynd/  
 alles so wir gewesen seynd/ alles so wir noch wer-  
 den/ alles so wir gehabt haben/ alles so wir ha-  
 ben/ alles so wir bekommen werden/ es sey zu  
 Leib oder Seel/ zum Weltlichen oder Geistlichen/  
 zum zeitlichen oder Ewigen/ das seynd vnd ha-  
 ben wir von deme/ so in der Person dreyfaltig/  
 im Wesen aber einig ist/ nemlich von GOTT vn-  
 serm Himmlichen Vatter/ Sohn/ vnd H. Geist/  
 so vns erschaffen/ gemacht/ erlöset/ vnd geheilt-  
 get/ Leib vnd Seel/ Haab vnd Gut/ vnd alles so  
 wir seynd vnd haben/ geben hat/ gibt/ vnd noch  
 forihin geben wirdt. Alle gute Gab/ (spricht der  
 H. Apostel Jacob) alle vollkommene Gaben/  
 kommen von oben herab vom Vatter der Liech-  
 ter. Was hastu/ (spricht der H. Paulus) das du  
 nit empfangen habest? Hastu es dann empfan-  
 gen/ was berümbst dich dann/ als ob du es nit  
 empfangen hettest? Dieweil dann deme allem  
 also wie wahr ist: Daß wir alle/ es sey Papst/  
 Bischoff oder K. yser/ König/ Fürst oder Herr/  
 Burger oder Bauer/ nichts von vns selbst  
 seynd noch haben/ sonder anderstwoher/ nem-  
 lich/ von GOTT: Weil wir so arme/ ellende/  
 schwache/ geringe Creaturen seynd/ daß wir von  
 vnd auß vns selbst nichts vermögen/ vns selb-  
 sten weder Leib noch Seel/ weder gesundheit  
 noch

Jacob. 1.

1. Cor. 4.

Alles haben  
 wir von  
 Gott.



noch sterck/weder Jugend noch Alter/weder ein  
langes leben noch die Seliqkeit/weder zeitlichs  
Gut noch Ewigs/weder Kunst noch geschick-  
ligkeit/weder schöne des Leibs/der Seel/ noch  
des Gemüts nit geben könden/sonder müssen al-  
les von einem andern aewarten/bitten vnd em-  
pfahen: Warumb wöllen oder solten wir vns  
dann vast hoffertig/stolz/vbermütig/brechtig  
vor GOTT vnd der Welt/von welchem wir al-  
les/was wir seynd vnd haben/empfabē müssen/  
erzeigen? Ja warumb (sprich ich) solten wir vns  
nit billich vor GOTT vnd der Welt sehr vnd  
hoch demütigen/wann wir disen vnsern gebre-  
chen/mangel/schwachheit vnd vnuermögenli-  
cheit ansehen/betrachten/vnd nur wol beher-  
sigen?

Warumb seynd vil Christen vnder vns/so  
wann nit wenig mangel am Leib/Haab vnd  
Gut/am zeitlichen vnd Ewigen haben? Dann  
allein darumb/das sie erstlich nit wöllen wissen/  
Das ihnen solches alles von GOTT herkömen  
muß/vnd das sie stolckiren/in höchster demut nit  
darumb bitten/sich weder vor der Welt noch  
vor GOTT demütigen wöllen: auß vbermut  
vermeynen sie/sie haben alles/was sie haben/  
von ihren Eltern/ auß ihrer Kunst/ geschicklig-  
keit oder handarbeit. Vnd wissen nit/ oder wöl-  
len ja nit wissen/das wann GOTT ihren Eltern  
nichts geben hett/wann er ihnen Kunst vnd ge-  
schickligkeit nit mitgetheilt hett/wann er ihnen  
gesunden Leib vnd sterck nit verlihen hette/ so  
hätten sie solches weder von ihren Eltern erer-  
ben/

Warumb  
dise zete  
ihren vil  
grossen mā-  
gel leiden.



ben/ noch sie selbst gewinnen könden. Du aber lieber Christ/ seitemaln du nun jekund weißt/ daß alles was du bist vnd hast/ nit von dir/ sonder von GOTT hast/ weil du nun/ sprich ich/ weiß dein vnuermögenlichkeit/ so nimme vrsach/ dich vor GOTT vnd der Welt/ so sehr als dir immer möglich ist/ demütigen. Vnd zwar muß ein jeder Mensch/ so dise sein eigne schwachheit mit vleiß erwegen thut/ eintweder Gottlos/ oder ja seiner fünff Sün beraubt seyn/ der sich noch nit demütigen sonder stolzkiren vñ grossen bracht treiben will.

Die ander  
Ursach.

Vnd wann ja jemandts so Gottlos/ rohlos/ seiner Seelen vnd seiner Seelen Heil selbst so feind wolt seyn/ vnd bochen/ Hoffart vnd vbermut treiben wolt/ vor GOTT vñ der Welt/ wegen seines Gelds vñ Guts/ so er eintweder Erbllich/ oder sonsten billich oder vnbillich bekommen hat/ so wirdt ihme doch dise Hoffart nit lang gut thun. Dann alles Geld vnd Gut ist zeitlich/ ist zergänglich/ wehret nit lang/ gehet hin wie es herkompt/ ist bald verthon/ wirdt schwärlich bekommen/ sorglich behalten/ gefährlich verthon. Heut hastu vil Haab vnd Gut/ morgen wirdt mit feur verbrent/ vom Wasser verschwembt/ vom Feind genommē/ vom Dieb gestolen/ vom Vngewitter/ Donner/ Schauer/ Hagel/ Erbidmen vmbgebracht. Heut bistu Reich/ morgen Arm: heut ein Edelmann/ morgen ein Bettelmañ: heut ein Burger/ morgē ein Bauer/ vbermorgen ein Köbler oder Söldner/ darnach ein Landjager. Reichthumb machet selten frumb/

Zeitlichs  
Gut ist zergänglich.



frumb/das Gelt erlöft nit vom Tod/weder vom  
zeitlichen noch Ewigen. Gebiете den Reichen/  
(spricht der H. Paulus zu seinem Timotheo) 1. Tim. 6.  
daß sie nit hoch oder hoffertig gesinnet seyen. Ist  
derhalben auch die Reichthumb/ vil Gelt/ Haab Gelt ist offte  
vnd Gut/ vil mehr ein vrsach/ darumb wir De. (do mans  
mütig dann hoffertig seyn sollen/ seitemaln sie mißbrau-  
vbernechtig/ vnd vns mehr ein vrsach zum ver- chet) ein vrsach  
derben vnd sterben dann zum leben ist/ wie dann des e-  
die teglich erfahrung mehrmaln mit sich bring- wigen tods.  
get.

Wann wir/ fürs dritte/ mit vleiß erweget Die dritte  
wurden/ vnsern Leib vnd leben/ den Anfang/ Ursach.  
das Mittel vnd Ende desselbigen/ so achte ich  
vnmöglich seyn/ wir müsten vns/ wir wolten  
oder wolten nit/ sehr vnd hoch vor GOTT vnd  
der Welt demütigen. Wann du erstlich den Anfang des  
Anfang deines Leibs vnd lebens beherkigest/ Menschen.  
wie vnd woher du kommest/ so findest/ Wie du  
aus einer so verwerfflichen vnd scheuslichen  
Matern Mensch worden/ wie du in Mutter leib  
mit einer so abscheuhlichen Speiß etlich Mo-  
nat ernehrt: Wie du mit einem so seltsamen  
Kleid auff dise Welt geboren/ mit einem so  
kläglichen geschrey oder weinen/ auch in der  
Sünd: Wie schwach vnd ellend/ wie krafftlos  
vnd vnuermöglich du gewesen seyest/ also/ daß  
du weder dich selbst speisen noch trencken/  
weder Ja noch Nein sagen könntest: deme/ der  
dir guts gethon/ hastu nit gedancket/ deme/  
so dir leides gethon/ könntest du nit widerstehen:  
an der Speiß vnd tranck so dir gereicht wur-  
de/



**Menschliche  
gebreden.**

de/musstest du zu friden seyn/auff allen vierē mu-  
stest du erstlich lernen gehn/dein narung köntest du  
in etlich Jaren nit gewinnen zc. Betrachte das  
Mittel/so findest ohn alle mühe/ja bald er als die  
lieb ist/wie vil trübseligkeit/widerwertigkeit/  
angst vnd not/Armut/Hunger vñ Durst/Hitze/  
Kelte vnd Frost/Kranckheit/Kummer/Bitter  
vnd forcht/Sünd/schand vnd laster du täglich  
schier ohne vnderlaß vnderworffen bist: Jekund  
kompt der Teufel/jekund dein eigen Fleisch/jekund  
die Welt/jekund das Welt/jekund dein  
Nechster/wenden ihren möglichen vleiß an/las-  
sen nit nach so lang/biß daß sie dich (wo du nit  
redlich mit dem Schwerde GOTTES wider-  
stand thust) versüren/vnd bringen jekund zu die-  
ser/bald zu jener Sünd/jekund in ein heimliches  
Laster/bald in öffentliche Schand/jekund zur  
vñ zweiflung/bald in die Ewige Verdammnis.  
Betrachte nur die böse vnd schändliche Welt/dar-  
innen du lebst/von welcher du täglich jekund  
verfolget/jekund wirst verspottet/verlachtet/  
verlogen/verunglimpfft/verschweket/vorhin-  
dert/vbernommen/mit allerley Handel/liegen/  
betriegen/kauffen/verkauffen/mit Maß/Meß/  
Gewicht/Eln/zc. Vnd in Summa/jekund/  
mußt du diß von disem/jenes von jenem/ein an-  
ders von einem andern leiden/vnd also ansich-  
tung vnd trübsal nimmer mehr ledig werden.  
Betrachte auch dein Ende/so wirst du nit wenig  
Trübsal/zitter vnd forcht finden. Daß du nit  
jmer vnd Ewig hie auff Erden leben wirst/das  
weist du wol. Daß sich/vnd nit ohne sonderlich

**Sündige  
Welt.**

**Das Ende  
des Men-  
schen.**



chen schmercken vnd grosse peyn/ Leib vnd Seel  
 widerumb scheiden müssen/ weistu auch wol: so  
 bald diß geschehen/ als dann wirdt dein Leib den  
 Würmē gebē zu einer speiß/ deine Nuzē/ Mund/  
 Hand vnd Fuß/ Angesicht vnd gancker Leib/ dar-  
 innen vñ damit du hie auff Erdē vil Vbermut/  
 Hoffart vnd bracht getrieben hast/ werdē jekund  
 vom Erdtrich/ von Würmen vnd andern vn-  
 gezifer gefressen/ du wirst gang vñ gar zu Rath  
 vñ äschen: do ist auch weder Schöne noch eini-  
 ge Gestalt/ nichts dann Todten beiner vnd gros-  
 ser gestanck: meniglich fleucht von dir/ jeder-  
 man hat ein abscheuen von dir: Allda muß der  
 Leib/ die Beiner/ äschen/ staub vnd Rath biß an  
 den Jüngsten tag bleiben/ darnach widerumb  
 aufferstehn/ vnd vor dem Richterful Christi sei-  
 nen Lohn/ die Seligkeit oder Verdammuß em-  
 pfahen. Dein Seel aber/ als bald sie vom Leib  
 geschiden/ kompt/ nach deme sie geglaubt vnd ge-  
 wircket/ eintweder in die Hell/ vnd da bleibt sie  
 Ewig: oder in den Himmel/ vnd da bleibt sie  
 auch Ewig: oder in das Fegfeuer/ vnd da  
 bleibt sie ein zeitlang. Siehe lieber Christ/ wol wir  
 Menschen so gar nichts seynd hie auff Erden/  
 wie ellende/ arme Creaturen wir seynd/ im An-  
 fang/ Mittel vnd Ende vnser lebens. War-  
 umb solten dann wir abermal vil vnd lang stol-  
 ziren/ hoffertig seyn/ vnd vns brächtig machen?  
 Ja gewislich soll auch eben dises alles ein vr-  
 sach/ vnd nur ein wichtige vrsach seyn vnser gut-  
 willigen Demütigkeit vor GOTT vnd der  
 Welt/ seitemaln wir nichts gewesen seynd noch  
 c E werden/



werden/ dann Rath vnd äschen. Was wil sich  
aber Rath vñ äschen vil erbrechen? Gar nichts.  
Sonder demütigen sollen wir vns/auff das wir  
erhöhet vnd Selig werden.

Die vierte  
Ursach.

Wann wir betrachten allerley oder vil Men-  
schen diser Welt sampt ihrem anligen/ mangel  
vnd gebrechen/ als/ einen sehen wir der ist Auf-  
fertig/ der ander Blind/ diser Einäugig/ jener  
Krumb/ diser Lam/ jener Bethrisig/ diser Was-  
fersüchtig: jener hat das Podagram/ diser das  
Zipperlin/ jener dise/ diser jene Sucht ic. So ha-  
ben wir billich abermal ursach gnug/ vns vor  
GOTT vnd der Welt zu demütigen/ Darumb/  
das wir eben so wol nur Menschen seynd als sie/  
Das wir auch bald/ vñleicht heut oder morgen/  
mit eben einer solchen oder noch schedlichem  
vnd vergifftern Sucht mögen behafft werden/  
darumb/ seitemaln wir eben so wol in der Straff  
vnd hand GOTTES stehn als sie/ seitemaln vns  
auch GOTT/ wann vnd wie er wil/ weaen vn-  
ser Sünd/ mit disen oder dergleichen Kranck-  
heiten vnd Sucht heimsuchen vnd straffen  
mag.

Die fünffte  
Ursach.

Die vier  
Elementen  
seynd vns  
nötig zur  
auffenthal-  
tung vnser  
zeitlichen  
Lebens.  
Gen. 3.

Wann wir auch betrachten die vier Ele-  
menten/ das Erdtrich/ Wasser/ Luft vnd  
Feuwer/ werden wir billich abermal zu wahrer  
Demut bewegt. Sehen vnd betrachten wir  
das Erdtrich/ als bald gedenccken vnd finden  
wir bey vns selbstem/ Das wir auß dem Erdr-  
trich genommen/ widerumb werden wir dareyn  
kommen. Betrachten wir den Luft/ so finden  
wir vnser Schwachheit/ Das wir ohne den  
selbi



selbigen nit leben könden/ Das er vns auch  
 offtermaln/ wann er vergifft ist/ tödtlich ver-  
 wundet. Das Wasser erweicht die Erden das  
 sie vns fruchte bringe/ ohne welche wir auch  
 leiblich vnd zeitlich sterben müsten. Wann das  
 Fehr nit were/ so müsten wir auch des Hun-  
 gers vnd vor grosser Kette sterben. Also/ das  
 wir aller vier Elementen so notwendig bedörf-  
 fen/ das wir nit leben können/ wo wir nur eins  
 vnder disen nit hetten. Darauß dann aber-  
 mal vnser Schwachheit folget / derhalben wir  
 vns abermal billich sehr vñ hefftig vor GOTT  
 vnd der Welt/ ja vor den vier Elementē/ Erdt-  
 rich/ Fehr/ Wasser vnd Luft/ demütigen sol-  
 len.

Hierzu wirdt auch nit wenig dienstlich seyn Die sechste  
 die Betrachtung vnfers Tods vñ der stund des Tods.  
 selbigen. Das wir Menschen alle ein mal ge-  
 boren / endlich auch ein mal widerumb sterben  
 müssen/ wissen wir alle wol/ vnd nit ein einiger  
 Mensch vnder vns allen ist welcher des Todes  
 möge vberhaben seyn. Wann aber/ wie/ wo/  
 vnd wie bald wir sterben müssen/ wissen wir nit/  
 vnd keiner ist/ der mit warheit sagen möge: Er  
 wisse/ das er noch ein Jar/ noch einen Monat/  
 noch einen tag/ ja nur noch ein stund leben  
 werde. Unmöglich ist es/ das du deinem Le-  
 ben (wider den willen GOTTES) nur einen  
 tag/ nur ein stund/ nur einen Augenblich hin-  
 zu thun köndest. Was wollen dann wir vil  
 auß vns selbst machen? Warumb wollen oder  
 sollen dann wir vns nit gern vnd willig vor



GOTT vnd der Welt demütigen? Warumb woltē wir nit in wahrer Demut/ auff den Tod/ auff die Stund des Todes/ auff die Ankufft des Herren warten/ auff daß/ wann er kompt/ vns demütig vnd bereitet finde/ vnd eynneime mit den fünff weisen Junckfrauen in das Ewig Vatterland?

Die sibend  
Ursach.

Vnser wahren Demütigkeit ist auch dis mit die geringste ursach: Daß wir auß Götlicher heiliger Schrift berichtet werden/ Daß GOTT in ihrem Gebett vnd Bitt erhöret die Demütigen/ die hoffertigen aber vnd stolzen laffet er leer gehn. Der Herr/ spricht der Königlliche Prophet David/ hat angesehen das Gebett der Demütigen/ vnd hat ihr Bitt nit verachtet. Vnd: Mein Demut hastu angesehen. Vnd die frumme Judith spricht: Das Gebet (D GOTT) der Demütigen vnd sanftmütigen hat dir allwegen gefallen. Vnd Jesus Syrach: Das Gebett desse der sich demütiget/ dringet durch die Wolcken biß es hinzu komme/ vnd wirdt auch nit getröstet vnd weicher nit biß der höchst GOTT ein auffsehen hab. Er hat (spricht MARIA) angesehen die Demut seiner Magd/ &c.

Die achte  
Ursach.

Darumb auch/ seiternaln Christus vnser Herr selbst vns Demütigkeit nit allein gelehrt/ sonder auch selbst im werck erzeiget: Welchem wir billich gehorsam zu leisten vnd seinem Exempel nachfolgen schuldig seynd/ wann wir anderst hie seine kinder/ vnd dort jimmer vnd Ewig mit ihme wöllē Selig seyn. Wer vnder euch (spricht der Herr zu seinen Jüngern vnd vns Christen allen)

Matth. 20.



allen) will der oberst seyn/der seye euwer Die-  
 ner: vnd wer da will der fürneraste seyn/der seye  
 euwer knecht. Vnd: Ihr nennet mich Meister **Joan. 13.**  
 vnd Herr/ vnd ihr saget recht/ dann ich binns.  
 So ich dann euwer füß gewaschen hab/ der ich  
 euwer Herr vnd Meister binn/ solt auch ihr euch  
 vndereinander die füß waschen. Dann ich hab  
 euch ein Exempel geben/ auff daß auch ihr ein-  
 andern thüet/ wie ich euch gethon hab. Vnd:  
 Wann du geladen wirst zur Hochzeit/ setze dich **Luc. 14.**  
 nit oben an. Vnd der H. Paulus: Das solt ihr **Phillip. 4.**  
 in euch fülen/ das ihr auch in Christo IESU fü-  
 let. Welcher/ ob er wol in Göttlicher gestalt war/  
 hat ers nit ein raub geachtet **GOTT** gleich seyn/  
 sonder hat sich selber vernichtet/ vnd die gestalt  
 eines knechts angenommen/ ist gleich worden  
 wie ein ander Mensch/ vnd im wandel als ein  
 Mensch erfunden/ hat sich selbst genidriget **2c.**  
 Der Herr Christus/ wann er Wunderzeichen **Matth. 8.**  
 gethon hat/ hat er verbotten man soll es nit sa- **15. 17.**  
 gen/ auff daß er vns ein Exempel gebe Demut **Mar. 7.**  
 zu lernen. Er gienge auch selbst hin zu Joanni **Matth. 3.**  
 dem Tauffer/ daß er von ihme getaufft würde.  
 lernet von mir/ spricht er/ dann ich binn **De. Matth. 11.**  
 mütig vnd eines sanfftmütigen herkens. Disem  
 seynd wir nachzecommen billich schuldig/ do wir  
 anderst seine kinder/ rechte Christen/ vnd endt-  
 lich selig seyn wollen.

Andere vrsachen/ warumb wir Christen vns  
 billich vnd gern/ vor **GOTT** vñ der Welt demü- **3. Reg. 21.**  
 tigen sollen/ seynd noch vil/ als: Daß die Demut **2. Par. 12.**  
 verhütet die straff **GOTTES**/ Daß dise so sich **Matth. 24.**



Matt. 18. 19. hie erhöhen/ hie vnd dort ernidriget werden/  
 Jud. 9. Das solche GOTT vnd der Welt angenehmem  
 Eccl. 35. 23. seynd/ vnd dergleichen vrsach mehr/ so zeit hal-  
 Luc. 7. ben jekund nit mögen angezeigt werden. Ge-  
 Jacob. 4. nug wirdt es vns seyn/ wann wir jekund ge-  
 1. Pet. 5. melte Vrsachen erwegen/ behalten/ vnser thun  
 Esa. 37. 66. vnd lassen/ Leib vnd Leben darnach richten  
 Job 5. werden.  
 Psal. 112.  
 114.  
 Prouer. 15.  
 18. 29.

Vnd diß ist billich gnug geredet vom ersten  
 Theil vorhabender Predig/ nämlich von der De-  
 mütigkeit/ vnd Vrsachen darumb wir billich  
 gern vnd willig Demütig seyn sollen/ am aller-  
 meisten aber diser vrsach/ so der Herr auff heu-  
 ten selbstem vermeldet: Das wir ohne dieselbigen  
 nit mögen selig werden.

Lasset vns derhalbē/ (ihr geliebten in GOTT)  
 wo wir nit von GOTT vñ auß heiliger Schrift  
 wöllen/ doch von den jungen Kindern wahre  
 Demut lernen/ auff das wir mit ihnen/ vnd sie  
 sampt vns/ vnd wir alle zu mal/ selig werden.

**D**er vbrige vnd ander Theil heu-  
 tigs Euangelij vnd Predig/ handelt  
 von der Ergernuß/ so ein Mensch dem  
 andern wissigklich gibt/ oder doch ein vrsach ist  
 das sich ein anderer Mensch vber seinen Wortē  
 vnd Wercken/ thun vnd lassen ergert. Die wort  
 Christi lauten also: Wer einen ergert auß  
 disen kleinen die an mich glauben/ dem we-  
 re besser ein Mülstein an seinem hals ge-  
 hägen/ vñ das er erseufft würde im Meer/  
 do es am tieffsten ist &c. Wiewol alda von der  
 Erg.



Ergernuß/ Was die selbige sey/ Wie man Er-  
 gernuß gibt oder nit gibt/ billich oder vnbillich  
 nimpt/ füglich weitläuffig gehandelt möcht wer-  
 den: will doch solchs die lenge diser Predig (dañ  
 sich der erste Theil zu weit erstreckt hat) nit ge-  
 statten/ mag auch darumb vnderlassen werden/  
 seitemaln solche vnd dergleichen Materien/ bis  
 zur anderen zeit vñ ort (in die grosse Postill) auff-  
 geschoben werden. Gung seye vns auff diß mal  
 mit wenig worten vnd einigem Exempel anzu-  
 zeigen: Daß mehrmaln auß einer Sünd ein  
 zwofache Sünd wirdt/ vnd diß wegen der Er-  
 gernuß. Der jenig Mensch/ so wissentlich vnd  
 williglich das Gebott GOTTES/ oder seiner  
 heiligen Christlichen Kyrchen/ bricht/ der sün-  
 diget ohne allen zweifel nit wenig/ ist billich auch  
 darumb zu straffen/ hie oder dort. Der jenig  
 aber/ so nit allein für sein Person vnd heimlich  
 sündigtet/ sonder vor augen vnd angesicht ander  
 leuten/ vnd etwan zu truck ander leuten/ der gibt  
 andern vrsach/ wo nit auch zu sündigen/ doch zur  
 Ergernuß/ erwann zu tadlen/ schamrot zu wer-  
 den/ oder doch dieselbige Sünd nit mehr für  
 sünd/ oder doch nit mehr für ein so grosse Sünd/  
 halten.

Obertret-  
 ter des Ge-  
 botts Gottes  
 seynd zu  
 straffen.

Fleisch essen/ ist für sich selbst vñ auß seiner Ein Exem-  
 art nit Sünd noch vnrecht/ Dann ein jede Cre. pel.  
 atur GOTTES gut erschaffen ist worden. Wan  
 aber ein gebott GOTTES/ oder seiner Kyrchen  
 hierzwischen kompt/ darinnen das fleisch essen/  
 zu diser oder jener zeit verboten wirdt/ vñ solchs  
 jemandts/ vber solchs gebott isset/ der sündigtet/



Ein anders  
Exempel.

Gen. 3.

Sünd ist  
es/das Ge-  
bott d' Christ-  
liche Kyrche  
brechen.

Halb Chri-  
sten.

Rom. 14.

Darumb/das er wider das Gebott GOTTES  
oder seiner Kyrchen williglich vnd williglich  
gehandlet hat. Der Apffel so auff dem jenigen  
Baum/der mitten im Paradis gestanden/ge-  
wachsen ist/war auß seiner art vnd erschaffung  
nit weniger gut zu essen als die anderen so auff  
andern Bäumen im Paradis gewachsen seynd.  
Dieweil aber ein Gebott GOTTES hertz zu kom-  
men/Adam vnd Eva sollen vom selbigen Ap-  
felbaum nit essen/haben sie gesündigtet/so bald sie  
dauon gessen/Darumb/weil sie wider das Ge-  
bott GOTTES gehandelt haben.

Welcher in der vierzigtagigen Fasten/sonsten  
auch am Freytag/Sampstag/oder zur anderen  
verbottnen zeit/ohne sonderliche vnd wichtige  
vrsachen/fleisch isset/der sündigtet/Darumb/  
das er das Gebott der H. Christlichen Kyr-  
chen/so solchs ohne sonderliche vrsachen nit ge-  
botten/auß verachtung oder mutwillen gebro-  
chen hat. Der jenig aber/so das fleisch öffentlich/  
vor menigklich/andern nur zu troß frisset/der  
sündigtet noch mehr/wegen der Ergernuß/so er  
den frumen Catholischen Christen gibt/so das  
Gebott der H. Christlichen Kyrchen zu bre-  
chen nit bedacht seynd/aber doch wegen eines  
Halb Christen fleisch fressen sehr geergert wer-  
den. Hieruon hat der H. Paulus vor fünffze-  
hen hundert Jahren also gelehrt: So aber dein  
Bruder vber deiner Speiß berrübt wirdt/so  
wanderstu schon nit nach der liebe. Lieber/ver-  
derb den nit mit deiner Speiß/vmb welches  
willen Christus gestorben ist. Darumb soll  
vns



vnser gutes nit gelästert werden. Dañ das Reich  
 GOTTES ist nit essen vnd trincken/sonder Ge-  
 rechtigkeit/frid/vñ freude in dem H. Geist. Wer  
 darinnen Christo dienet/der ist GOTT vnd den  
 Menschen wolgefellig. Darumb lasset vns dem  
 nachstreben das zum frid dienet/vnd das hal-  
 ten/das vns allen zur besserung reicher. Du solt  
 nit vmb der Speiß willen zerstören GOTTES  
 werck. Es ist zwar alles rein. Aber es ist nit gut  
 dem Menschen der es also isset/das er Ergernuß  
 dadurch gebe. Es ist besser/du essest kein Fleisch/  
 vnd du trinckest kein Wein/oder das/daran sich  
 dein Bruder stoffet oder ergert/oder schwach  
 wirdt. Diser zeit findet man vil leut/vnd ge-  
 meinglich die jenigen all/so sich Euangelisch  
 nennen/so nit vil nach disen wortē des H. Pau-  
 li fragen/fressen fleisch wider vnd vber das Ge-  
 bott der H. Christlichen Kyrchen/am Freytag/  
 Samstag/in der Fasten/vnd zu andern ver-  
 botnen zeiten/nit angesehen/das sie gar wol wis-  
 sen/das sie ihren Nechsten sehr ergern/zu zeiten  
 auch zur sünde reizen/vnd mit ihnen vngenor-  
 same Fleischfresser zu werden vrsach geben.  
 Könnte derhalben nit schaden/das ih:nen/nach  
 dem billichen vrtheil Christi/ein Müllstein am  
 haß hienge/vnd ersöffen im Meer do es am  
 tieffsten ist/ neben diser straff/das sie mehrmaln  
 am heiligen Ostertag kein fleisch zu essen haben/  
 weil sie dasselbig in der heiligen Fasten auffge-  
 fressen habē. Wider solche leut sagt der H. Pau-  
 lus noch ein mal: Ehe das ich meinen Nech-  
 sten mit fleisch essen ergern wolt/ehe wolte ich

Merckthe  
 neuwe Chri-  
 sten.

Fleischfres-  
 ser lernen  
 vom heilige  
 Paulo.



nimmer mehr kein fleisch essen.

Also ist auch von andern Sünden vnd Ergernussen zu antworten. Dann GOTT nit allein die Sünd für sich selbst/sonder auch die Ergernuß/ ja die Sünd so erwann auß der Ergernuß eruolget/ an dem jenigen so sündiger vnd Ergernuß geben hat/ erwann hie zeitlich/ erwann dort Ewig/ erwann zeitlich vnd Ewig/ straffen will. Hieruon zu seiner zeit weitlenffig vnd ausführlicher.

Nun haben wir gehört/ Wie wir vns verhalten müssen/ wann wir nach disem zeitlichen leben das Ewig erlangen wollen: Wir müssen nit Ehrgeizig/ nit Stoltz/ nit vbermütig noch Hoffertig/sonder Demütig/ Einfaltig/ Schlecht/ gerecht/ frumb/ als wie die Kinder seyn/ bey welchen weder neid noch haß/ weder zorn noch Ehrgeizigkeit ist. Wir haben auch etliche vnd zwar wichtige Ursachen gelehrt vnd gehört/ darumb wir billich Demütig seyn sollen. Zu lest auch: Daß wir nit allein nit sündigen/sonder auch nit Worten oder Wercken/ thun oder lassen/ niemandts kein Ergernuß geben sollen/ auff daß wir nit im Meer oder in der Hell/ do sie am tieffsten ist/ ersauffen/sonder mit den Demütigen vnd frummen kindlin/ Ewig mögen selig werden/ Amen.

Gebettlin zu  
Gott dem  
Himmelschen  
Vater.

**W**ir bekennen/ O GOTT Him-  
melischer Vatter/ daß wir vñ ju-  
gend auff zur Sünd der Ehrgeiz-  
igkeit/ Hoffart vnd vbermut/ zur begirde  
hoch



hoch oben an sitzen / vber andere herrschen  
 vnd regieren wollen / geneigt seynd: be-  
 kennen auch / daß wir hierinnen sündi-  
 gen vnd vnrecht thund. Derhalben sa-  
 gen wir dir / **D G O T T** / möglichsten  
 danck / daß du vns durch deinen gelieb-  
 ten Sohn vnsern Heiland **I E S V M** Chri-  
 stum / von der Ehrgeizigkeit abgeschreckt /  
 vnd nach dem Exempel der kleinen kin-  
 der zur wahren Demütigkeit ermanet /  
 vnd ja außdrucklich verkündigen hast  
 lassen: Daß wann wir Selig werden wol-  
 len / müssen wir wie die kinder Demü-  
 tig seyn. Verleihe vns auch Gnad / daß  
 wir vns vor allen Sünden vnd Erger-  
 nuß geben / sekund vnd jeder zeit hüten mö-  
 gen / auff daß wir nit verdampt / sonder  
 mit den kleinen kindern mögen selig wer-  
 den / Amen.

Am Tag der Erhebung des heiligi-  
 gen Bischoues Dithonis / zum theil  
 zu Bamberg feyerlich.

Am 30. tag  
 Septemb.

**M** Vff heut halten wir die Erhes-  
 bung des heiligen Bischoues D-  
 thonis zu Bamberg vnd Reichtri-  
 gers / von Erbar vnd gewaltigen  
 Eitern / nämlich Bartholdo vnd  
 Sophia geboren. Ward des Bischoffs Ruber-  
 ti nach